

“Cietdakbuh” Loeg Nyied Loeg Yauznding:

Baijyienj Daegsaek Vwnzva Yauzcuz Rangh Nazmbaeklae Lungzciz

红瑶六月六“晒衣节”展示龙青梯田瑶族文化特色

□ Luz Gyangz Suswnggh ingj Sinhyungz hoiz



Mehmbwk Yauznding angq foux lungz, gyoengqvunz yawj le caez hemqhaenh.



▲ Buhnding cangndang lengj, seiqlengq lumj va lwenq.



▲ Eu fwen caiq diuq foux, gyoengqdou cungj sim' angq.



▲ Fungcingz Yauzcuz miz lai yiengh, diegdangz yienj hawj hekyouz yawj.



▲ Angqyangz venj gwnz naj, laeuj hah gyoengq beixnuengx.

“Cietdakbuh” dwg ngoenzciet conzdungj hoenghwd gyoengq beixnuengx Yauznding Mbanjinhgwngh ranghdieg ginggih nazmbaeklae Lungzciz Lungzswng Gak Cuz Swciyen, moix bi liggaueq ndwenloeg coloeg hoengh banh, gij hoengh de caenh beij ndwencieng iq di. Ngoenz ciet angqyangz neix, gyoengq beixnuengx Yauznding gak ranz cungj dawz gij buhvaq, vunjva, doxgaiq cangndang okdaej dak ndit, lij banh gij hozdung angqhoh gig miz daegsaek minzcuz dangdieg haenx, ndaw mbanj sing loxlez sing gyong coux hek yiengj mbouj dingz, sing go sing fwen sepsit rwenzred, gyoengq mbauqsau diuq foux yegyeg, gizgiz cungj angqyangz hoenghwd, yinx gyoengqhek gak dieg caenx haeuj mbanj humx yawj.

“Cietdakbuh” Yauznding Ginhgwngh gaenq miz geij bak bi lizsij, riuznaeuz gij ndit ngoenz liggaueq ndwenloeg coloeg mied doeg gaj nengz ceiq ak, doxgaiq dak ndit le mbouj hwnj mwt, non mbouj dwk, lij ndaej dak seuq gij heiq mbouj gitleih haenx. Ngoenz neix, gyoengq meh-

mbwk Yauznding gak ranz gak hoh cungj dawz gij buhva, buhcangndang, vunjva ndaw loengx okdaej dak, gwnz faexsax, laj yiemhranz gak ranz baenz roix baenz coij buh vunj ndingnding loegloeg lwenqyab yapda, “cietdakbuh” couh baenzneix heuh roengzdaej. Gyoengq beixnuengx Yauznding daengx mbanj ranzranz cungj gaj bit gaj gaeq, suek faengx, guh ceizndek, hek daengz ndaetfwd nauhyied dangqmaz, gij lwgmbwk haq okbae caeuq boux daeglwg coemq bae mbanj wng haenx, cungj rap duzbit, laeujhaeux caeuq huqlaex, aemq lwgnyez ma ranzmeh doxcomz gwnngaiz. Ngoenz neix, gyoengq cunhminz ram duzmagim riengzlaeng goengsae, byaij bae gak ranz gak hoh guh caeqbaiq mbaenj fuk. Cungqyang ndaw mbanj cix gaqdap ndei aen daizheiq, vunz lai gak mbanj doxlwnz hwnj daiz yienj go foux conzdungj, cezmuiz lai cungj lai yiengh, ndei yawj raixcaix. Ndaw mbanj lij banh gak cungj gak yiengh guhhong doxdax, miz daemhaeux, gawqfaex, dozmae, daemjbaengz, baenqvax, labnyumx,

confaex gvaekrin diemjfeiz daengi doxdax; lij miz aen hozdung cien vunz coux moq, mehmbwk Yauznding youq henz dah fou gyauej roi byoem, fungcingz Yauzcuz lai cungj lai yiengh, hawj gyoengqhek yawj mbouj gib bae; fouxgyongraez, fouxfaexsax, eu fwen doiq fwen daengi go foux daegsaek hawj gyoengqhek roxyiuj gij vwnzva swngghoz lai cungj lai yiengh beixnuengx Yauznding; siuqva daemjbaengz, san haizcauj daengi dinfwngz biujyienj baijyienj le gij cingsaenz mehmbwk lwgsau Yauznding vunz gvai fwngz soem, vunz gaenxgyaek gwn ndaej hoj. Doengxngoenz angqyangz hoenghwd, doengxhaemh cix engq nauhyied, gyoengq vunz lai Yauznding fwngz yaengx bogfeiz youq gwnz haenznaz Nazmbaeklae Lungzciz byaij dwk, geij cien gaem bogfeiz gyoebbaenz duzlungz, duzfungh youq doenghnaz doengh-yabyab, ndei yawj raixcaix, hawj Mbanjyauz youq ndaw doengx-haemh laepsaengsaeng haenx dem le faenh gingjsaek maezvunz ndeu.



▲ Mehmbwk Yauznding yienj daemjrok, hawj gyoengq hekyouz daengj mehfwngz.



▲ Lwgsau Yauznding dinfwngz soem, doxiu doxcomz guh seuisuiq.



▲ Ngoenzciet mbwn cix gvengq, saulengj angq fou gyauej.



▲ Eu hot fwen coux hek, ngoenzciet nauhyied raeuh.



▲ Loeg nyied loeg ndit haenq, mehmbwk nyaengq dak buh.



▲ Ngoenzciet angq doiq fwen, sing haprwenz ndei dingq.